



KENYATAAN RASMI
22 Disember 2021

**PR1MA SUMBANG KEWANGAN DAN TENAGA KERJA UNTUK BANTUAN
BENCANA BANJIR 2021**

*Keutamaan diberikan kepada pembeli rumah PR1MA yang terjejas
dengan bencana alam*

PETALING JAYA -- Perbadanan PR1MA Malaysia (PR1MA) telah memperuntukkan **sumbangan kewangan dan tenaga kerja untuk membantu Keluarga Malaysia yang terjejas dengan bencana alam** baru-baru ini.

Banjir besar akibat hujan lebat yang berterusan tersebut telah menjejaskan 8 buah negeri di Semenanjung Malaysia sehingga mengakibatkan banjir terburuk dalam tempoh lebih lima dekad di Kuala Lumpur dan Selangor.

Pengerusi PR1MA, Dato' Dr. Fathul Bari Bin Mat Jahya berkata **Bantuan Bencana Banjir 2021 #PR1MAKita** ini merupakan langkah yang diambil untuk **meringankan beban keluarga terutamanya kakitangan, pembeli rumah PR1MA, dan juga masyarakat amnya yang terjejas teruk akibat banjir.**

Menerusi konsep Keluarga Malaysia diperkenalkan YAB Perdana Menteri Dato' Sri Ismail Sabri Bin Yaakob, ia memberikan penekanan dalam membina masyarakat yang harmoni dan majmuk sekaligus memperkukuhkan kita sebagai satu keluarga.

"Ini merupakan masa yang terbaik untuk kita saling bantu membantu memperkasakan keluarga yang kita kasih dan hormati. Justeru, selari dengan aspek keterangkuman dan kebersamaan, PR1MA sebagai agensi di bawah KPKT bertindak proaktif dalam memainkan peranan dan inisiatif untuk menyantuni dan membantu masyarakat yang terjejas dengan bencana banjir ini.

"PR1MA bersama-sama dengan Kerajaan berganding bahu dalam membantu mangsa banjir di kawasan-kawasan yang terjejas." Katanya dalam satu kenyataan hari ini.

Di samping itu juga, **PR1MA membuka satu saluran untuk membantu pembeli rumah PR1MA yang telah menandatangani Perjanjian Jual Beli rumah (SPA) dan kini menyewa di kediaman lain sementara menanti kediaman mereka siap, untuk memohon bantuan tersebut.**

Bagi pembeli yang terjejas ini, **PR1MA akan menghubungi secara terus untuk memastikan mereka yang terkesan dengan bencana alam ini dapat di bantu sedaya mungkin.**



PR1MA juga akan menyalurkan **bantuan** dalam bentuk bakul makanan dan juga kelengkapan harian iaitu **2,000 set tilam, bantal dan selimut, serta 3,000 set tuala untuk mereka yang terjejas**. Bagi pembeli rumah PR1MA yang telah menandatangani SPA serta terjejas akibat banjir ini, pihak kami akan berhubung terus dengan tuan dan puan dan kami beriltizam untuk membantu dengan sewajarnya.

Sementara itu, Ketua Pegawai Eksekutif PR1MA Datuk Haji Mohd Nazri bin Md. Shariff berkata, terdahulu PR1MA telah menjadi salah satu penggerak utama Program Mobilisasi Vaksin Komuniti (MOVAK) KPKT dalam membantu mempercepatkan kadar vaksinasi di kalangan populasi di Malaysia. Inisiatif PR1MAKita diteruskan dalam menangani musibah banjir yang tidak terduga ini.

PR1MA turut membuka penglibatan kepada lebih 400 kakitangannya untuk turun padang di beberapa lokasi di Selangor bagi membantu mereka yang terjejas seperti kerja-kerja pembersihan dan pengagihan bantuan, selari dengan Tanggungjawab Sosial Korporat PR1MA di bawah aspirasi PR1MAKita.

"PR1MA bekerjasama dengan Kementerian Perumahan dan Kerajaan Tempatan (KPKT) dan agensinya seperti Jabatan Bomba dan Penyelamat Malaysia (JBPM) serta Perbadanan Pengurusan Sisa Pepejal dan Pembersihan Awam (SWCorp Malaysia) bagi memastikan koordinasi dan gerak kerja yang teratur.

"Harapan kami adalah semoga bantuan ini sedikit sebanyak akan dapat mengurangkan kegusaran mereka yang kini ditimpa musibah yang tidak diduga," katanya.

Untuk sebarang pertanyaan lanjut, sila hubungi kami di 03-76289898 atau e-mel ke info@pr1ma.my. Waktu operasi kami: Isnin hingga Ahad 9.00 pagi hingga 6.00 petang (kecuali Cuti Umum di Negeri Selangor).

-TAMAT-
